

ցին այժմ գիւղերում ո՛չ մի առանձին ծէս չի կատարուում, և ո՛չ մի երգ չի երգուում, ինչպէս որ եղել է հնումը: Աերջապէս զուռնան հնչում է պսակ տանելու եղանակը և ահա սենեակից դուրս են բերում նորահարսին, ուր նորափեսան խաչեղբայրով և ագապներով սպասում է. ապա շարոււմ են միմեանց ետևից, նախ զուռնաչին և թմբկահարը, նրանց հետոււմ է մի գծի վրայ հարսը, փեսան և աջ կողքից խաչեղբայրը. սրանց ետևից խուռն հասարակութիւնը և կողքերից ձիաւար ջահիլները՝ դիմում են եկեղեցի: Հէնց որ հասնում են եկեղեցու դուռը, զուռնան իսկոյն կտրում է իր ձայնը մինչև հարսու փեսայի եկեղեցուց դուրս գալը: Եկեղեցում քահանան խոստովանեցնում է հարսու թագաւորին, ձեռք ձեռքի տալիս և ապա գլուխ գլխի դրած՝ պսակում. խաչեղբայրն էլ խաչը դնում է սրանց գլուխներին: Պսակից լետոյ, երբ հարսն ու փեսան եկեղեցուց դուրս են գալիս, ջահիլներն սկսում են հրացաններ արձակել, սուր, ձի խաղացնել. ապա բոլորն նոյն կարգով, տեղական սովորութեան համաձայն, շարականներ կարգալով գնում են հարսի տունը, ուր ճաշ են տալիս հասարակութեանը, որից լետոյ մէջտեղ են բերում մի ոչխար, որի գլուխը թագաւորը թուրի մի հարւածով պիտի կտրի: Ապա նորից «ծաղիկ» (փող) են հաւաքում և մօտ չորս ժամ քէֆ անելուց լետոյ թագաւորին վերցնում և գնում են նրա տունը, ուր մինչև երեկոյ ուրախութիւն են անում և ապա ընթրում: Այնուհետև մօտ 20 հոգի թագաւորին տանում են հարսի տունը, ուր թագաւորին զանազան հարցեր են տալիս. —

— Սարգարիդ ո՞վ է կարել. թագաւորը չի պատասխանում, մինչև որ զոքանչից փող չի օտանում. ապա հարց է տալիս աները. թագաւորը դարձեալ չի խօսում. աները 5 զուռն փող է նւիրում, դրա վրայ թագաւորը խօսում է: Այնուհետև սկսում են քէֆ անել, պարել մինչև առաւօտ:

Առաւօտեան հարսի հայրը մի գլուխ շաքար և երեք թուման փող մի մատուցարանի մէջ պատրաստում և նւէր